

- IV. ADMINISTRACIÓN LOCAL - IV.2 MUNICIPAL - PORTO DO SON

ANUNCIO Pág. 10996 Reg. 10960-x.

Anterior

Siguiente

Ordenanza de normalización lingüística para a súa publicación

ORDENANZA DE NORMALIZACIÓN LINGÜÍSTICA

INDICE

LIMIAR

CAPÍTULO I

DO USO OFICIAL DO IDIOMA GALEGO

CAPÍTULO II

ÁMBITO DE APLICACIÓN

CAPÍTULO III

DAS RESOLUCIÓNNS E DA DOCUMENTACIÓN ADMINISTRATIVA.

CAPÍTULO IV

DAS RELACIÓNNS COAS E COS ADMINISTRADOS

CAPÍTULO V

DAS RELACIÓNNS INSTITUCIONAIS

CAPITULO VI

DOS AVISOS, PUBLICACIÓNNS E ACTIVIDADES PÚBLICAS.

CAPÍTULO VII

DOS REXISTROS

CAPÍTULO VIII

ATENCIÓN AO PÚBLICO

CAPÍTULO IX

TOPÓNIMOS, SINALIZACIÓN E RÓTULOS

CAPÍTULO X

DA SELECCIÓN, PROVISIÓN E RECICLAXE DO PERSOAL

CAPÍTULO XI

DO CUMPRIMENTO E SEGUIMENTO DA ORDENANZA

CAPÍTULO XII

DO IMPULSO INSTITUCIONAL

CAPÍTULO XIII

SERVIZO DE NORMALIZACIÓN LINGÜÍSTICA

LIMIAR

PREÁMBULO. LINGUA GALEGA E LEXISLACIÓN

Segundo se establece no artigo 5 do Estatuto de Autonomía de Galicia de 1981, a lingua propia de Galicia é o galego. Como lingua oficial, todos/as os/as galegos/as teñen o dereito de coñecela e de usala. Así mesmo, establécese que os poderes públicos de Galicia potenciarán o emprego do galego en todos os planos da vida pública, cultural e informativa, e disporán os medios necesarios para facilitar o seu coñecemento.

Por outra parte, a Lei 3/1983, do 15 de xuño de normalización lingüística (DOG 14/7/83) di, no seu artigo 4, que o galego, como lingua propia de Galicia, é lingua oficial das institucións da Comunidade Autónoma, da súa Administración, da Administración Local e das Entidades Públicas dependentes da Comunidade Autónoma e, no artigo 6, que os poderes públicos de Galicia promoverán o uso normal da lingua galega, oralmente e por escrito, nas súas relacións cos cidadáns. Pola súa parte, no artigo 11 faise referencia explícita á capacitación lingüística dos/as traballadores/as da administración e, así, afirmase que os poderes autonómicos promoverán a progresiva capacitación no uso do galego do persoal afecto á Administración Pública e ás empresas de carácter público en Galicia. No artigo 25 da mesma Lei sinálase que o Goberno Galego e as Corporacións Locais dentro do seu ámbito fomentarán a normalización do uso do galego nas actividades mercantís, publicitarias, culturais, asociativas, deportivas e outras. Con esta finalidade e por actos singulares, poderanse outorgar reducións ou exencións das obrigas fiscais.

A Carta Europea das Linguas Rexionais ou Minoritarias asinada en Estrasburgo en novembro de 1992 fai referencia no artigo 10 ás autoridades administrativas e aos servizos públicos e sinala, entre outras medidas a seguir, o emprego de linguas rexionais ou minoritarias no marco da administración local así como tamén a publicación dos

textos oficiais nesas mesmas lingua s. Igualmente, sinálase a necesidade de facilitar e/ou fomentar por calquera medio o uso das lingua s rexionais ou minoritarias (artigo 13).

A Declaración Universal dos Dereitos Lingüísticos asinada en Barcelona en xuño de 1996 establece no seu artigo 3 o dereito dos membros dunha comunidade lingüística a seren atendidos na súa lingua nos organismos oficiais e nas relacións socioeconómicas e, no artigo 12, o dereito que todas as persoas teñen no ámbito público a desenvolver todas as actividades na súa lingua, se é a lingua propia de onde reside. Mais concretamente, este texto considera nos artigos 15 a 22 os dereitos lingüísticos da comunidades en relación coa administración pública e órganos oficiais. Así, o artigo 17 expón o dereito a dispoñer e obter toda a documentación oficial na lingua propia, calquera que sexa o soporte, así como o deber que os poderes públicos teñen de dispoñer de formularios, impresos e modelos na lingua propia do territorio e ofrecerlos ao público.

A Lei 5/1997, do 22 de xullo (DOG 05/08/97) de administración local de Galicia pronúnciase de xeito máis amplio sobre o uso do galego polas entidades locais de tal xeito que no artigo 7 podemos ler que o galego, como lingua propia de Galicia, é tamén da súa Administración local. As convocatorias de sesións, ordes do día, mociones, votos particulares, propostas de acordo, ditames das comisións informativas, actas, notificacións, recursos, escrituras públicas, comparecencias xudiciais e todos os actos de carácter público ou administrativo que se realicen por escrito en nome das corporacións locais redactaranse en lingua galega. Ademais, esta lei obriga a redactar en galego, cando menos, unha serie de documentos locais e obrígalle á Xunta a desenvolver un programa de formación lingüística do persoal ao servizo da Administración local: A Xunta de Galicia impulsará o proceso de incorporación da lingua galega na Administración local, especialmente a través de programas de formación do funcionariado das entidades locais en lingua galega. Outro contido de especial importancia é o referido aos requisitos de coñecemento da lingua galega, que se estipulan no capítulo IV. A este respecto, e no que se refire ao funcionariado con habilitación nacional, no artigo 240.2 dise que tanto as corporacións locais como a Xunta de Galicia deberán incluír nas bases do concurso aqueles factores ponderados que garantan un grao suficiente de coñecemento da lingua galega para desempeñar as funcións do seu posto de traballo. Verbo dos demais funcionarios de carreira, o artigo 245 establecece no seu apartado sexto que nos sistemas de selección que se realicen para o acceso ás prazas da Administración local terá que demostrarse o coñecemento da lingua galega. Establécese pois a obriga de garantir o coñecemento do idioma galego. Tamén se incorpora neste texto legal outro punto de vista, o dos veciños e veciñas, por medio do dereito de elección lingüística para os cidadáns e as cidadás galegas; concretamente o artigo 252.d establecece que os cidadáns teñen dereito a utilizar o idioma galego nas súas relacións coas corporacións locais na Comunidade Autónoma de Galicia.

Outro dos piares básicos no referente á normalización e promoción do galego no ámbito local é o Plan Xeral de Normalización Lingüística. O PXNL, elaborado pola Dirección Xeral de Política Lingüística da Xunta de Galicia e aprobado en 2005, sinala entre os seus obxectivos, conseguir para a lingua galega máis funcións sociais e máis espazos de uso, priorizando a súa presenza en sectores estratégicos así como asegurar que na administración local o galego sexa a lingua habitual nas relacións internas, entre as administracións e cos cidadáns, respectando o dereito individual a ser atendido na outra

lingua oficial. No mesmo PXNL citase a importancia de consolidar o papel normalizador da corporación local por medio da xeneralización do uso do galego como principal lingua de traballo e comunicación cos seus administrados, da necesidade de incluír a promoción do galego, no concepto de servizo que o concello lle ofrece aos cidadáns, (tanto directamente como a través de empresas subcontratadas) e, por outra banda, de poñer os medios para que todo traballador ao servizo directo ou indirecto da administración local teña unha actitude favorábel ao emprego da lingua propia de Galicia e coñecemento oral e escrito suficiente para atender nesa lingua o cidadán que o deseche.

PAPEL DA ADMINISTRACIÓN LOCAL NO PROCESO DE NORMALIZACIÓN LINGÜÍSTICA

Sabemos que os resultados obtidos na maior parte das investigacións sociolingüísticas sobre a lingua galega, baseadas en rigorosos traballos de campo, atribúenlle ás administracións un peso e unha responsabilidade moi importante no proceso de normalización do idioma propio. Sirva como exemplo que no Mapa Sociolingüístico de Galicia o 83,3% das persoas entrevistadas considera que os concellos de Galicia teñen bastante ou moita responsabilidade na normalización do galego.

Estes resultados deben ser interpretados como unha mostra da forte asociación que a cidadanía aprecia entre os poderes públicos e a lingua propia. Para os cidadáns, as administracións realizan dúas funcións esenciais: son o principal elemento catalizador do proceso de normalización do idioma e, por outra parte, atribúenlle os valores asociados á identidade lingüística propia.

Entendemos que esta dobre atribución debe implicar, polo tanto, un forte compromiso da administración local coa promoción do idioma así como o deber da súa aceptación e defensa. Á administración local compétele, entón, velar polo cumprimento da lexislación vixente no que a lingua galega se refire así como aplicar un principio elemental da normalización: a coherencia entre mandato e acción.

Unha administración pública como a municipal ten unha serie de responsabilidades en canto ao uso e promoción da lingua galega que non debe desatender:

- * Responsabilidade sobre si mesma e nas súas funcións públicas: uso público da lingua galega na administración municipal ou nas entidades que desenvolven as súas funcións; o que pode incluír a capacitación lingüística dos/as traballadores/as, a corrección e asesoría, a regulación de usos nas funcións administrativas ou os incentivos aos/as traballadores/as para o seu uso.
- * Responsabilidade nas súas relacións coa sociedade como organización administrativa: requisitos lingüísticos no acceso á función pública ou cláusulas nas contratacións públicas municipais.
- * Responsabilidade sobre a cidadanía en xeral: fomento da capacitación lingüística, servizos de corrección e asesoría, mellora de actitudes e fomento do uso.

ASPECTOS SOCIOLINGÜÍSTICOS

A pesar da existencia de textos legais que avalan a oficialidade e a necesaria promoción da lingua galega, tanto a nivel administrativo como no conxunto da sociedade, atopamos certas eivas no proceso de normalización lingüística que confirman a actuación imprescindíbel por parte da administración local. Tal actuación debe traballar para evitar un proceso desgaleguizador que se está a producir en toda Galicia, pero que no noso municipio é ainda moi feble, pois o Censo de Poboación e Vivenda do Instituto Galego de Estatística (IGE) de 2001 ofrece o dato dun 92'8 % de falantes monolíngües en galego, fronte a un 1'72 % de monolíngües en castelán, ainda que comeza a amosar síntomas preocupantes entre a poboación que está entre os 5 e os 18 anos, con só o 89'61% de monolíngües en galego. Para evitar o avance deste abandono do galego, compre elaborar e aprobar unhas liñas de actuación constante para que a lingua maioritaria da poboación teña unha presenza en todos os ámbitos da vida municipal e se é posible, no conxunto da sociedade do concello de Porto do Son.

Tendo en conta tanto os factores de tipo legal e lexislativo como aqueles relacionados co eido sociolingüístico, consideramos que a aprobación polo Pleno do Concello de Porto do Son dunha Ordenanza municipal de normalización lingüística constitúe o xeito más efectivo de facer do galego a lingua normal de comunicación, de fixar os criterios lingüísticos a seguir nas diferentes situacións comunicativas e de impulsar as actividades de promoción lingüística no conxunto da sociedade sonense.

OBXECTIVOS DESTA ORDENANZA DE NORMALIZACIÓN LINGÜÍSTICA DO CONCELLO DE PORTO DO SON

Alterar a corrente de desgaleguización lingüística que é froito da histórica postergación dos dereitos lingüísticos colectivos e individuais do pobo galego no ámbito do noso Concello. Ou dito doutro modo, que o mundo municipal sirva aos intereses xerais de defensa e promoción da nosa lingua propia, converténdose nun axente positivo de regaleguización social, sen vulnerar en ningún momento outros dereitos tamén recoñecidos nin invadir en ningún caso competencias doutras instancias administrativas e políticas.

ORDENANZA DE NORMALIZACIÓN LINGÜÍSTICA DO CONCELLO DE PORTO DO SON

CAPÍTULO I

DO MARCO XURÍDICO E USO OFICIAL DO IDIOMA GALEGO

ARTIGO I

1.1. O Concello de Porto do Son recoñece e garante o uso normal e oficial do galego e o castelán, como linguas oficiais de Galicia, tal como se establece na Constitución española, no Estatuto de autonomía de Galicia e na Lei de normalización lingüística para todos os planos da vida pública, cultural e informativa no ámbito do seu territorio.

1.2 O Concello de Porto do Son, como administración local pública de Galicia, en cumprimento do mandato de normalización da lingua propia de Galicia e da Lei de administración local de Galicia, asegura e fomenta o uso do galego e corrixe a situación de desigualdade histórica respecto do castelán.

1.3 O galego, como a lingua propia de Galicia, é tamén a lingua propia do Concello de Porto do Son. Na súa consecuencia, é o idioma oficial normal e prioritario de uso do Concello de Porto do Son. Para lograr a concreción deste uso normal, o efectivo coñecemento e a máis ampla difusión da nosa lingua dentro do seu ámbito territorial planificará a súa actividade tendo en conta este mandato.

1.4 A determinación deste réxime lingüístico na Administración municipal implica a concreción de deberes para as persoas con especial vinculación co Concello: cargos, funcionarios e persoal contratado, fixo e/ou eventual.

1.4.1 As autoridades e cargos (alcalde e concelleiros) teñen unha dobre natureza que implica a necesidade de matización na concreción dos seus deberes lingüísticos con respecto a esta ordenanza: como cargos de natureza política, non inseridos na estrutura administrativa municipal están exentos deste deber de cumprimento da ordenanza municipal pero, en tanto que actúen como órganos de superiores da estrutura administrativa que dirixen, deberán aterse a esta e apoiaranse nos servizos técnicos correspondentes cando sexa necesario.

1.4.2 Os funcionarios de habilitación nacional (secretario, interventor e tesoureiro) ateranse en todo ao disposto nesta ordenanza e, en relación coa capacitación, formación e acreditación dun grao suficiente de coñecemento de galego cinguiranse ao establecido na Lei de administración local de Galicia vixente.

1.4.3 Para os demais funcionarios de carreira e traballadores por conta municipal aplicarase o disposto na Lei de normalización lingüística.

1.4.4 Todos os funcionarios e/ou traballadores, fixos e/ou eventuais municipais terán dereito a recibir a formación adecuada ao posto para o uso correcto do idioma galego. Tamén, en segundo lugar, terán prioridade no acceso ás acción formativas que o Concello dispoña as persoas vinculadas cos poderes públicos e os que se relacionen cos cidadáns como consumidores e usuarios.

1.5 En todos os casos, a alegación de descoñecemento da lingua deberá facerse razoada e verazmente de modo que non caberá alegar tal descoñecemento se quen o fai ten acreditado falar ou entender o galego.

1.5.1. Ningún servizo, departamento ou área poderá carecer de persoal capacitado no suficiente coñecemento da lingua galega, ponderado para cada caso pola RPT e o Servizo de Normalización Lingüística para cumplir con esta ordenanza.

1.5.2 A alegación razoada de descoñecemento da lingua eximirá de responsabilidade sobre o incumprimento desta ordenanza.

1.5.3. Os arrendatarios ou prestadores de servizos públicos municipais que accedan a estas prestacións tras a correspondente oferta pública, non poderán alegar descoñecemento da lingua galega tras a sinatura do contrato correspondente, que será en galego.

1.6. As actuacións administrativas realizadas en galego no territorio municipal terán plena validez e eficacia.

1.7. A cidadanía terá dereito a ser atendida e obter copia ou recibir notificacións da documentación municipal no idioma oficial que elixa.

O Concello disporá dos servizos lingüísticos adecuados para corresponder a este dereito. E porá a disposición dos funcionarios e/ou traballadores os medios que os capaciten para salvagardar os dereitos dos cidadáns a este respecto.

CAPÍTULO II

ÁMBITO DE APLICACIÓN

ARTIGO II

2.1. Para garantir e promover os usos da lingua galega por parte do Concello de Porto do Son e dos organismos que del dependan -padroados, organismos autónomos, sociedades anónimas municipais, medios de comunicación, escolas, etc.- deberase rexer polos criterios establecidos nesta ordenanza.

2.2 Este principio xeral de normalización da lingua galega na actividade pública do Concello inclúe, en primeiro lugar e en consonancia coa xurisprudencia do Tribunal Constitucional, a todas as persoas e organismos que exercen funcións públicas, directamente ou por delegación, concesión ou calquera outro título, en segundo lugar, a todas as persoas particulares con vinculación cos poderes públicos; e, en terceiro lugar, os particulares que pola súa actividade deban velar pola defensa dos dereitos dos consumidores e usuarios nos seus aspectos lingüísticos.

2.3. As empresas adxudicatarias ou concesionarias que actúan por conta deste Concello, así como as de explotación mixta, farán o propio, e deberase facer constar explicitamente nos documentos correspondentes.

2.4. O Concello de Porto do Son velará para que no ámbito interno e nas actividades en que participe -convenios, consorcios- se apliquen os principios anteriores aquí establecidos co fin de garantir os intereses xerais. En ningún caso e sexa cal for a forma ou a técnica que o Concello utilice para se organizar e prestar servizos, por si só ou en asociación con outros, se libera da responsabilidade de velar por e cumplir esta ordenanza e a demais normativa relativa aos deberes lingüísticos como administración pública.

2.4. O Concello de Porto do Son mantén un Servizo de Normalización Lingüística (SNL) co obxectivo de xestionar e aplicar a política lingüística do Concello e pular pola normalización do Concello. Todos os organismos anteriormente citados han de se axustar aos criterios de corrección e uso lingüístico que difunda oficialmente o Servizo de Normalización Lingüística. O SNL gozará de iniciativa propia para establecer e controlar a política técnica de normalización municipal, realizar informes oficiais no seu ámbito de traballo, propostas de actualización, corrección e mellora na xestión e control da ordenanza.

CAPÍTULO III

DAS RESOLUCIÓNS E DA DOCUMENTACIÓN ADMINISTRATIVA

ARTIGO III

3.1. As actuacións internas do Concello faranse, prioritariamente e como mínimo, en galego.

3.2. Redactaranse, como mínimo, en galego:

a) As convocatorias das sesións de todos os órganos colexiados da Corporación e nomeadamente as do Pleno, Comisión de Goberno, comisións informativas, consellos sectoriais, entidades con personalidade xurídica dependentes deste Concello e tribunais de oposicións e concursos.

b) As actas das sesións dos ditos órganos municipais.

c) As resolucións do alcalde, dos concelleiros delegados e o seu Libro de rexistro.

3.3. A Alcaldía e os rexedores, e tamén as diversas dependencias administrativas ou servizos, redactarán en lingua galega os ditames, informes e propostas que teñan que someterse á decisión ou coñecemento de calquera órgano corporativo municipal.

3.4. Todos os impresos utilizados polos diferentes órganos do Concello de Porto do Son redactaranse en galego; sempre e cando non afecten a outras Administracións do Estado.

Os impresos e documentos normalizados ofrecidos ao cidadán deberán conter un medio para que o cidadán faga constar cal é a opción lingüística elixida. No caso de que o cidadán non a cubra nin manifeste nada neste sentido, o Concello aterase ao principio de preferencia pola lingua galega.

3.5. Os rótulos indicativos de oficinas e despachos así como as notas e avisos públicos - sexan fixos ou temporais- as cabeceiras de toda clase de impresos, os selos de goma e outros elementos análogos han estar escritos en galego.

3.6. As aplicacións e programas informáticos han estar adaptados para o funcionamento en lingua galega ou, como mínimo, permitirán que a documentación pública escrita ou gravada que resulte da súa utilización estea en galego. Neste sentido, cando se trate de adquisición de programas, sistemas, soportes, utilidades e instrumentos de tecnoloxía informática, terá preferencia aquel que mellor cumpla con este requisito; en igualdade de condicións técnicas.

ARTIGO IV

4.1. Cando o Concello encargue estudos a terceiros, proxectos e traballos análogos, cando sexan persoas físicas ou xurídicas con domicilio en Galicia, halles demandar que sexan realizados, cando menos, en galego.

4.2. O Concello requiriralles aos seus contratistas e provedores, cando sexan persoas físicas ou xurídicas con domicilio en Galicia, a presentación da documentación, cando menos en galego e que, na máxima medida posibel, fagan uso do galego nos bens e nos servizos que sexan obxecto do contrato En calquera caso o Concello é responsábel de

garantir, perante os cidadáns e cidadás o dereito ao uso normal da lingua galega e protexer o dereito de uso da lingua da súa elección. Estes requisitos han de constar no prego de condicións dos contratos administrativos que aprobe o Concello.

CAPÍTULO IV

DAS RELACIÓN COAS E COS ADMINISTRADOS

ARTIGO V

5.1. Todos os expedientes administrativos do Concello de Porto do Son tramitaranse, como mínimo, en lingua galega; e sempre e cando non afecten a outras Administracións do Estado.

5.2. Sempre que calquera interesado o solicite formalmente, entregaránselle os documentos que lle afecten ou solicite (sempre e cando teña dereito á obtención de ditos documentos, de acordo coa normativa reguladora da materia) na lingua oficial que demandase. En calquera caso non se interromperá a tramitación en galego.

5.3. As comunicacóns e notificacións dirixidas a persoas físicas ou xurídicas residentes no ámbito lingüístico de Galicia faranse en lingua galega, sen prexuízo do dereito dos cidadáns a recibilas, se así o demandan formalmente, en castelán.

5.4. Os expedientes dos que o Concello sexa Administración pública instrutora e que deban ter algún ou todos os efectos fóra dos territorios nos que a lingua galega sexa idioma oficial ou nos que non se recoñeza o dereito ao seu uso, faranse de oficio na lingua oficial que corresponda, para evitar desvalorizar o uso oficial e duplicar inutilmente o traballo administrativo.

ARTIGO VI

Os impresos ofreceranse en versión galega, sen prexuízo do dereito dos particulares a cubrilos en castelán. O Concello facilitará a tradución ao castelán daqueles impresos propios da Administración que así se soliciten. O Concello non terá a obriga de dispoñer de modelos de documentos do cidadán noutra lingua que a galega.

ARTIGO VII

Só se farán impresos bilingües cando algunha circunstancia especial así o requira, de acordo coas orientacións que estableza a comisión á que se refire o artigo 30 e por proposta do Servizo de Normalización Lingüística. O texto galego figurará sempre de forma preferente.

ARTIGO VIII

8.1 Consonte recomenda o Plan xeral de normalización da lingua galega aprobado polo Parlamento galego, nas comunicacións administrativas orais, o persoal do Concello tanto nas que inicie como nas que reciba, ofrecera o saúdo en lingua galega e seguirá a comunicación no noso idioma, a non ser que o/a administrado/a demande expresamente ser atendido/a en castelán.

8.2 Para que o Concello de Porto do Son poida cumplir co seu deber, en tanto que Administración pública, de corresponder cos dereitos lingüísticos dos cidadáns, os funcionarios e traballadores do Concello de Porto do Son deberán coñecer ambas linguas oficiais. O nivel de coñecemento será ponderado co perfil lingüístico do posto que ocupa, que será concretado no correspondente documento ad hoc (RPT do persoal) do Concello; para o persoal externo que xestione servizos públicos, o Servizo de Normalización Lingüística deseñará e proporalle ao Pleno a correspondente analoxía.

8.3 Os establecementos abertos ao público, que non son meros suxeitos privados como demostra a regulación da súa actividade en múltiples aspectos do seu funcionamento, deberán asegurar a non discriminación da lingua galega nas súas actividades e garantir os dereitos lingüísticos dos cidadáns nas relacións económicas privadas que establezan con eles.

ARTIGO IX

Os documentos públicos e os contractuais outorgados polo Concello redactaranse sempre en galego. No caso en que o Concello concorra xunto con outros outorgantes, o documento redactarase tamén na lingua que se acorde e, se for o caso, o Concello solicitará unha copia auténtica en galego para incorporala no expediente.

CAPÍTULO V

DAS RELACIÓNIS INSTITUCIONAIS

ARTIGO X

10.1. A documentación que o Concello dirixa a calquera das administracións públicas, entidades e empresas situadas no territorio galego redactarase en lingua galega.

10.2. As comunicacións do Concello dirixidas á Administración civil ou militar do Estado e á de Xustiza dentro do ámbito lingüístico galego redactaranse en lingua galega, independentemente do feito de que esta documentación ou os expedientes que con ela se relacionen teñan o seu efecto fóra deste ámbito.

Así mesmo, en todos os procedementos xudiciais nos que o Concello sexa parte demandará o uso da lingua galega como lingua de tramitación, e presentará no noso idioma todos os informes, escritos, e as comparecencias do persoal que sexan pertinentes no proceso serán en lingua galega. A representación legal do Concello seguirá a este respecto o principio xeral de uso preferente do galego.

ARTIGO XI

11.1. Os documentos do Concello dirixidos ás administracións públicas que vaian ter efectos exclusivamente de fóra do ámbito lingüístico galego tamén se redactarán na lingua oficial que conveña.

11.2. As copias dos documentos do Concello en galego que deban de enviarse a administracións públicas de fóra do ámbito lingüístico galego tramitaranse en galego e castelán, coa indicación neste último caso de que o texto é tradución do orixinal galego

e achegarase, no caso de ser posíbel, a tradución, visada polo Servizo de Normalización Lingüística, na lingua propia ou oficial da administración respectiva.

ARTIGO XII

Respecto dos documentos dirixidos directamente aos organismos centrais de ámbito estatal comunitario ou internacional, o Concello aterase ao que prevén as disposicións vixentes, redactándoos sempre que sexa posíbel en galego.

CAPÍTULO VI

DOS AVISOS, PUBLICACIÓN S E ACTIVIDADES PÚBLICAS

ARTIGO XIII

Os anuncios oficiais da Corporación que se publiquen no Boletín Oficial da Provincia, Diario Oficial de Galicia, ou en calquera outro medio de comunicación radicado no territorio da comunidade autónoma galega serán redactados en galego.

ARTIGO XIV

Os cargos do Concello de Porto do Son expresaranse normalmente en galego nos actos públicos que se realicen en Galicia, sempre que a intervención sexa por razón do propio cargo.

ARTIGO XV

15.1. Os libros, as revistas e, en xeral, todos os carteis e publicacións que edite o concello de Porto do Son, así como tamén as mensaxes que se emitan nos medios de comunicación, faranse en lingua galega, excepto aqueles destinados específicamente á promoción no exterior, que se poderán facer na lingua dos destinatarios.

15.2. A publicidade que se distribúa fóra do ámbito lingüístico galego farase sempre en versión dobre: galego e castelán ou galego e a lingua dos destinatarios.

ARTIGO XVI

Todos os textos que vaian ser publicados polo Concello de Porto do Son deberán ser corrixidos lingüisticamente polo persoal responsable do Servizo de Normalización Lingüística.

CAPÍTULO VII

DOS REXISTROS

ARTIGO XVII

Nos rexistros administrativos das oficinas do Concello de Porto do Son os asentamentos faranse sempre en galego, sen prexuízo do que establecece o artigo 9 da Lei 3/1983 para os rexistros públicos.

CAPÍTULO VIII

ATENCIÓN AO PÚBLICO

ARTIGO XVIII

18.1. Os servizos da oficina de información e demais unidades administrativas que teñan unha relación co público máis intensa promoverán o uso do idioma galego mediante a súa utilización como lingua normal de comunicación e información aos cidadáns dos seus dereitos lingüísticos, de acordo cos criterios de máximo respecto e non discriminación.

18.2. As empresas ou entidades que presten servizos públicos municipais por concesión, arrendamento ou concerto deberán igualmente utilizar o galego como lingua normal de información e comunicación co público.

CAPÍTULO IX

TOPÓNIMOS, SINALIZACIÓN E RÓTULOS

ARTIGO XIX

19.1. De acordo co que establecece o artigo 10 da Lei 3/1983 de normalización lingüística, a única forma oficial dos topónimos do Concello de Porto do Son é a galega.

19.2. O uso da toponimia aterase ao disposto pola Comisión de Toponimia da Xunta de Galicia.

19.3. O Concello de Porto do Son promoverá a recuperación, coñecemento e uso da toponimia do territorio municipal e preservará as formas tradicionais dos lugares, tanto da toponimia maior como da toponimia costeira, hidronimia e microtoponimia.

ARTIGO XX

Os rótulos, sinalización da Casa do Concello, dos outros edificios e servizos públicos e da rede viaria municipal dependentes do Concello ou instalados polas súas empresas adxudicatarias ou concesionarias ou calquera outra entidade, serán redactados en idioma galego, cinguíndose sempre á normativa oficial. Os textos dos rótulos e sinalización deberán, en todo caso, ser revisados lingüisticamente polo persoal do Servizo de Normalización Lingüística.

ARTIGO XXI

Todos os vehículos do parque móvil municipal, das empresas municipais e da policía local, levarán a súa rotulación en galego. Isto mesmo será de aplicación ao parque móvil das empresas adxudicatarias ou concesionarias de servizos municipais, e así se establecerá nos correspondentes pregos de condicións.

ARTIGO XXII

O establecido no artigo anterior tamén será de aplicación a todo o vestiario municipal.

CAPÍTULO X

DA SELECCIÓN, PROVISIÓN E RECICLAXE DO PERSOAL

ARTIGO XXIII

A declaración de oficialidade do idioma galego esixe que todo o persoal ao servizo da corporación estea en condicións de empregalo en dous niveis, oral e escrito, en igualdade co castelán.

ARTIGO XXIV

24.1. Nas convocatorias para o acceso a prazas de persoal do Concello, xa sexa funcionario, laboral ou de calquera outro xeito, ha de figurar, como condición obrigatoria, que todos/as os/as aspirantes demostren o coñecemento oral e escrito da lingua galega conforme á función que vaian desempeñar.

24.2. Por proposta da Comisión de seguimento desta ordenanza, o Pleno do Concello establecerá nas bases das convocatorias o nivel de galego que deberán demostrar e acreditar os/as aspirantes.

ARTIGO XXV

25.1. Na provisión de postos de traballo, incluídos os cargos con habilitación nacional, os/as candidatos/as deberán posuír un grao de coñecemento da lingua galega, tanto oral coma escrito, que os/as faga aptos/as para desenvolver as súas funcións.

25.2. Por proposta da Comisión de seguimento desta ordenanza, o Pleno do Concello, á hora de definir os postos de traballo, establecerá os niveis e contidos do coñecemento oral e escrito da lingua galega para cada caso, e considerará o coñecemento expreso da lingua galega como requisito necesario ou mérito preferente de acordo coa avaliación que se estableza.

ARTIGO XXVI

O/a responsábel do Servizo de Normalización Lingüística formará parte dos tribunais cualificadores para valorar os coñecementos de galego na selección de persoal e na provisión de postos de traballo.

ARTIGO XXVII

As persoas responsábeis dos diferentes órganos do Concello de Porto do Son, de acordo co Servizo de Normalización Lingüística, tomarán as medidas necesarias para que, nos órganos da súa competencia, o persoal que neles traballe teña os coñecementos precisos de galego co fin de garantir un desenvolvemento correcto, desde o punto de vista lingüístico, das tarefas internas ou dirixidas aos/ás administrados/as.

ARTIGO XXVIII

O Concello de Porto do Son, de acordo co Servizo de Normalización Lingüística, organizará cursos de lingua galega para todo o funcionariado que non teña os coñecementos necesarios para exercer as súas funcións e para mellorar o nivel de linguaxe administrativa ou doutras especialidades.

ARTIGO XXIX

Todo o funcionariado deberá adquirir o nivel de coñecemento de lingua galega establecido para o posto de traballo, de acordo cos criterios e termos que fixe a Comisión de seguimento da ordenanza. O persoal ao servizo da corporación que teña acreditado o coñecemento do idioma galego ou participase nos programas de formación ou perfeccionamento deberá utilizalo no seu traballo.

ARTIGO XXX

A formación profesional do persoal funcionario e laboral do Concello de Porto do Son farase en lingua galega, sempre que dependa do Concello a programación e organización. De non depender del, o Concello demandará que se faga en galego.

CAPÍTULO XI

DO CUMPRIMENTO E SEGUIMENTO DA ORDENANZA

ARTIGO XXXI

31.1. Para garantir o cumprimento desta ordenanza, crearase unha Comisión Interdepartamental de Seguimento integrada cando menos polo/a alcalde/alcaldesa, o/a secretario/a xeral, o/a xefe/a de persoal, a persoa responsable do Servizo de Normalización Lingüística, un/unha representante de cada grupo político que forme parte da Corporación municipal, un/unha representante do comité de empresa e outro/a da xunta de persoal.

31.2. Esta Comisión de seguimento reunirase polo menos dúas veces ao ano para analizar o cumprimento e desenvolvemento desta ordenanza, e extraordinariamente cando a convoque o/a alcalde/alcaldesa por iniciativa propia ou por pedimento dalgún dos seus membros.

31.3. A actualización, ampliación ou revisión da ordenanza corresponderá tamén á Comisión de seguimento, que fará o estudo e levará a proposta correspondente ao Pleno do Concello para que, se procede, se aprobe a modificación.

ARTIGO XXXII

Tamén é competencia da Comisión de seguimento adoptar, chegado o caso, as medidas que se consideren oportunas para o cumprimento desta ordenanza.

CAPÍTULO XII

DO IMPULSO INSTITUCIONAL

ARTIGO XXXIII

33.1. De acordo co establecido no art. 25 da Lei de normalización lingüística do galego, o Concello de Porto do Son fomentará a normalización do uso do galego nas actividades mercantís, publicitarias, asociativas, culturais, deportivas e calquera outra dentro do ámbito municipal.

33.2. O Servizo de Normalización Lingüística ocuparase das tarefas que se realicen institucionalmente para impulsar o uso do galego, de acordo cos criterios que establece a comisión de seguimento desta ordenanza.

33.3. Todos os organismos do Concello de Porto do Son pularán pola normalización lingüística no seu ámbito de actuación co asesoramento do Servizo de Normalización Lingüística e de acordo cos criterios que establece a Comisión de seguimento desta ordenanza.

33.4. O Concello de Porto do Son poderá outorgar redución ou exencións de obrigas fiscais para as actuacións relacionadas coa normalización lingüística, conforme co artigo 25 da Lei de normalización lingüística.

CAPÍTULO XIII

SERVIZO DE NORMALIZACIÓN LINGÜÍSTICA

ARTIGO XXXIV

O Servizo Municipal de Normalización Lingüística deberá ocupar unha posición no organigrama de funcionamento do Concello que permita que a actividade de normalización lingüística do Concello se estenda homoxeneamente a todos os departamentos e servizos municipais.

O SNL aplicará a política lingüística que defina o Pleno da Corporación ou a Comisión delegada á que se lle atribúa esta competencia.

O SNL contará cos medios necesarios para o cumprimento dos seus fins proporcionados polo Concello ou a través de convenios e actividades de colaboración institucionais e sociais.

O SNL contará coa necesaria colaboración dos demais departamentos do Concello para o cumprimento destes fins.

O Servizo Municipal de Normalización Lingüística deberán contar, cando menos, cun responsable técnico titulado en lingua galega: licenciado en filoloxía galego-portuguesa, en filoloxía galega ou en filoloxía hispánica (sección galego-portugués).

ARTIGO XXXV

Obxectivos

Asegurar que na Administración local o galego sexa a lingua habitual nas relacións internas, nas relacións entre as administracións e nas relacións cos cidadáns, respectando o dereito individual a ser atendido na outra lingua oficial.

Incrementar o uso da lingua galega na Administración local nas súas relacións internas e garantir a atención aos cidadáns en galego.

Asistir tecnicamente aos distintos departamentos municipais para que os actos xurídicos documentados e as relacións xurídicas e notariais se fagan correctamente en galego.

Consolidar o papel normalizador da corporación por medio da xeneralización do uso do galego como principal lingua de traballo e comunicación cos administrados.

Incluir a promoción do galego, no concepto de servizo que o concello lle ofrece ao cidadán, tanto directamente como a través de empresas subcontratadas.

Ordenar e servir os medios para que todo traballador ao servizo directo ou indirecto da Administración local teña unha actitude favorábel ao emprego da lingua propia de Galicia, coñecemento oral e escrito suficiente para atender nesa lingua o cidadán que o deseñe e que teña tamén práctica habitual da oferta positiva ou inicial do uso do galego.

ARTIGO XXXVI

Funcións:

Serán, como marco orientador da súa actividade permanente as seguintes:

A) Internas:

- a) Dispor dunha análise completa, detallada e periódica da situación lingüística na administración municipal
- b) Proporcionarlle a todo o persoal municipal os apoios necesarios para o uso do galego.
- c) Conseguir a plena galeguización do funcionamento da administración municipal. Evitar o desequilibrio no uso do galego entre os departamentos culturais e os técnicos da Administración local.
- d) Velar porque sexa aplicada a Lei de normalización lingüística de Galicia, no ámbito de actuación da entidade local correspondente, así como a Lei do uso do galego como lingua oficial de Galicia polas entidades locais e a ordenanza de normalización do Concello.
- e) Controlar a calidade lingüística e a homoxeneización da linguaxe e os modelos documentais empregados cos criterios estándares da linguaxe xurídico-administrativa galega.
- f) Establecer normas xerais e uniformes sobre capacidade lingüística esixíbel nos procesos de selección de persoal e no desempeño da función pública municipal.

g) Programar o proceso de formación lingüística dos funcionarios que teña como obxectivo mellorar as actitudes, a fluidez expresiva e mais o coñecemento do vocabulario técnico específico.

B) Externas:

a) Dispôr das bases necesarias para realizar unha planificación coherente da política lingüística externa.

b) Ofrecerlle ao público asesoramento lingüístico para a corrección de textos galegos e para a súa tradución, se fose posibel.

c) Impulsar a normalización do galego nos diferentes ámbitos da vida pública

d) Provocar avances significativos na galeguización das empresas privadas asentadas no Concello, especialmente nos sectores clave dende o punto de vista económico e sociocultural.

e) Colaborar coas iniciativas galeguizadoras das entidades cidadás.

f) Incidir especialmente no uso social da lingua entre a poboación infantil e xuvenil a través de propostas que completen a acción dende a educación regada.

g) Procurar a colaboración permanente entre as administracións autonómica e municipal en todas as iniciativas que vaian xurdindo no ámbito da normalización lingüística.

h) Velar porque en todos os traballos topográficos e cartográficos que faga ou encargue a administración leven incorporada a recollida da microtoponimia, consonte o sistema deseñado pola Comisión de Toponimia e que o material toponímico recollido deberá ser remitido ao SITGA, para a súa organización.

i) Controlar que todos os contratos e axudas públicas, de calquera tipo, produzan un aumento efectivo da presenza do galego na entidade receptora e avaliar o cumprimento.

Porto do Son, xullo de 2006

Asdo) Ramón Quintáns Vila, Alcalde